

DISQUISITIO MEDICA
INAUGURALIS,

DE

SONORUM MODULATORUM VI
in corpora humana :

QUAM

ANNUENTE SUMMO NUMINE,

Ex auctoritate ornati admodum viri

GULIELMI WISHART, S.T.D.

ACADEMIAE EDINBURGENAE PRAEFECTI;

NEC NON

Amplissimi SENATUS ACADEMICI consensu,
et nobilissimae FACULTATIS MEDICAE decreto;

PRO GRADU DOCTORATUS,

SUMMISQUE IN MEDICINA HONORIBUS ET PRIVILEGIIS
RITE ET LEGITIME CONSEQUENDIS,
ERUDITORUM EXAMINI SUBJICIT

ISAACUS BROWN, ANGLUS.

Ad diem 3 Maii, hora loquoque solitis.

EDINBURGI:

Apud HAMILTON, BALFOUR, et NEILL:
M,DCC,LI.

Digitized by the Internet Archive
in 2019 with funding from
Wellcome Library

ADAMO ASKEW,

MEDICO CELEBERRIMO,

Apud NOVUM-CASTELLUM,

ISAACUS BROWN,

S. P. D.

CUM juveni medico opus sit viro summae auctoritatis et dignitatis eum in medicinae Ædem deducere, ad quem melius quam ad Te confugiam ; qui morum suavitatem eruditione exornas, eruditionem hilaritate temperas ; quique ea me semper commoditate facilitateque, quae Tui propria est, excepisti.

OCCASIONEM nactus tam laetam, vix mihi temperare possem quin Te summis laudibus pro meritis prosequi velim, nisi probe mihi foret compertum, Te eadem opera atque studio,

dio, quibus bonorum omnium laudes mereri
 fatagis, laudantium quoque voces atque prae-
 conia amoliri: mihi saltem liceat gratias
 Tibi, ob propensum tuum erga me animum,
 quam maximas habere. Quod si pro me
 spondere possim, summo studio ac diligen-
 tia, quo minus benevolentiae tuae te poeni-
 teat, efficere conabor.

VALE amicissime et praestantissime vir;
 et dum aliorum saluti invigilas, tuam dili-
 genter cura.

Dabam ex Colleg. EDINBURG.

DISQUISITIO MEDICA

INAUGURALIS.

De Sonorum modulatorum vi, &c.

SECT. I.

IPSIUS naturae facem praeferentis, atque monstrantis viam, presso passu, vestigia legerunt temporibus priscis et seculis melioribus, idque optimo consilio, periti Phoebeae artis; id negotii sibi solum esse creditum reputantes, ut eam studiose sublevarent obrutam et opem invocantem, allatis in subsidium exercitatione, diaeta et medicamentis salubribus paucis sane et simplicibus; non ut opprimerent languidam, et jam viribus fractam, farragine splendida et speciosa, magis quam utili pharmacorum. Nec ab hac re alienam duxerunt esse musicen; quin potius maximi fecerunt ut artem sociam et sororem medicinae, cum utrifque apud antiquos idem Deus opifer aequae prae-fuerit.

Nunc autem ars isthaec plane divina a medicatris sequioris aevi spreta et neglecta, heu pudor!

cedere bolis putidis, et catapotiis nauseam moventibus coacta est. At ego eo nomine hanc Dissertationem institui, ut apud gentes quam minime barbaras, in quanto pretio et honore ars musica semper fuerit ostenderem; quotque miras et magnas concentus sonorum inducat mutationes corporibus nostris; et inde quomodo magnopere ad valetudinem restituendam et conservandam conferat, ut potero, indagarem et exponerem.

MULTI quidem in hoc campo defudaverunt, et hanc scientiam variis modis, prout cuique licuit, tractavere. Alii θεωρητικῶς, soni rationes modosque supputando, quod Harmonicam dixerunt: vel numeros sonis tonisve quoad tempus applicando, et exponendo mensuras eorum longas et breves, celeres et lentas sibi invicem succedentes, quod appellaverunt Rythmicam. Alii πρακτικῶς, qui tradendis praeceptis operam navant componendi cantum, idque quoad concentum et Harmoniam, et hoc dicitur Melopoeia; vel denique de applicatione numerorum et temporis, quod est antiqua Rythmopoeia. Sed nullus ex eis quotquot sint (quos mihi saltem videre contigit) penitus hanc rem exploravit, ut usus ejus eximius in medicina magis sit perspectus, quanquam ex tali disquisitione non minus jucunditatis, quam lucri percipiendum est.

Huic arti maxima vis est amoenitate quadam animum perfundendi, laetitiaque afficiendi ab omni

omni faece purgata ; haec jucunditate vitam condit ; pectus humanum atris curis dirisque solitudinibus oppressum levat ; angoribus adhibet solatium ; animum excitat, evibrat, et modis profecto miris reddit hilarem ; suaviter affectus moderatur et lenit, intimamque mentem summa cum voluptate pervadit ; emollit mores, et ex ferocibus mites facit et mansuetos ; nec quisquam est adeo inconcinne a natura comparatus, qui non hanc amet, hac delectetur. Quorsum tam multa ! Imperium in animos animique impetus omnes, integrum penes est musicam *.

E veteribus quidem philosophis multi †, nec non adstipulator eorum cl. Rollin ‡, inter hodiernos, haud dubitarunt asseverare DEUM O. M. auctorem esse musicae ; quoniam existimabant necesse artem illam esse divinae originis, cujus tam miranda erant effecta supraque omnem hominis captum.

* *Musica cum de secreto naturae tanquam sensuum regina, tropis suis ornata, processerit ; reliquae cogitationes exiliunt, omniaque facit ejici, ut ipsam solummodo delectet audiri ; tristitiam noxiam jucundat ; tumidos furores attenuat ; cruentam saevitiam efficit blandam ; excitat ignaviam soporantemque languorem ; vigilantibus reddit saluberrimam quietem, sanat mentis taedium ; pernicioosa odia convertit ad auxiliatricem gratiam ; et per dulcissimas voluptates expellit animi passiones, incorpoream animam corporaliter mulcet, et solo auditu ad id quod vult deducit. Cassiodor. epist. ad Boeth. Mus.*

† *Itaque prorsus veneranda est musice, deorum inventum cum sit. Plut. de musica, oper. tom. 2. p. 1116.*

‡ *Histoire des arts et sciences.*

captum. At si ita se res haberet, statim et de improvviso isti musici *θεοδιδάκτοι* in Timotheos et Handेलios, sine institutione vel usu, evaderent.

VERUM aliud docet experientia, quod, sicut caeterae artes, haec etiam ab imitatione orta est; ideoque inter initia rudis et inculta, cum agrestes indocti miserum carmen disperdere stipula stridula in sylvis solebant; deinceps multorum ingenio et industria paulatim ad fastigium ultimum evecta est.

VOLUPTAS ex hac nata, cum sit ita consentanea menti nostrae facile fidem facit, quod haec scientia est antiquissima; quis adeo modulationis expertus est, cujus aures illi dulces modi non delectent, cum citharaedus nervos lyrae canorae sollicitat docta manu, vel cum mellita verba a viva cantoris voce lepide fluunt? et cujus animus non delinitus est numerorum harmonia et sonorum? Contra, quis adeo inficetus et fatuus cui summam molestiam dissonantia non pariat, auresque dolore perstringat? “Nihil enim est tam cognatum mentibus nostris quam numeri atque voces, quibus et excitamur, et incendimur, et lenimur, et languescimus *.”

OMNES

* Cicer. de orat. lib. 3.

Habet musica naturalem voluptatem, per quam illius usus cunctis aetatibus cunctisque moribus est acceptus. Arist. politic. lib. 8. cap. 5.

OMNES artes praeter hanc, vel a necessitate, vel a luxu proveniunt ; haec vero a fonte nobiliore fluit : natura ipsa nobis iniecit musices amorem, et implicuit animo nostro harmoniae quandam cupidinem, quae prope sola nil habet in se turpis vel fordidi. Cumque nobis connata sit, non dubium est, quin extemplo post homines natos, ars haec coelestis terris emicuerit. Veroque similimum est viros primos in opacis sylvis et saltibus aetatem plurimum degentes, primos cantandi magistros habuisse aves canoras concentum suavem in virgultis fundentes, quae modulamine cantus assidui mentes eorum demulcebant, et ad imitandas provocabant. Ut cecinit Poeta nostras graphicus :

—————*Up springs the lark,
Skrill-voic'd, and loud, the messenger of morn ;
Ere yet the shadows fly, he mounted sings
Amid the dawning clouds, and from their haunts,
Calls up the tuneful nations. Every copse
Deep-tangled, tree irregular, and bush
Bending with dewy moisture, o'er the heads
Of the coy quiristers that lodge within,
Are prodigal of harmony. The thrush
And wood-lark, o'er the kind contending throng
Superior heard, run thro' the sweetest length
Of notes.——*

*The blackbird whistles from the thorny brake ;
The mellow bullfinch answers from the grove :
Nor are the linnets, o'er the flowering furze*

Pour'd

*Pour'd out profusely, silent. Join'd to these
Innumerable songsters, in the freshening shade
Of new-sprung leaves, their modulations mix
Mellifluous. The jay, the rook, the daw,
And each harsh pipe discordant heard alone,
Aid the full concert: while the stock-dove breathes
A melancholy murmur thro' the whole.*

SPRING.

A fide autem non abhorret, homines illecebris
his, vel potius incantamentis avicularum com-
munis nemoris consortium exstimulatos, (nisi
suae voces seipfos possent latere) conaturos esse
aemulari modulationes, a quibus tantum perce-
perant voluptatis. Unde prima musica fuit vo-
calis, sive modulata vocum varietas. Sic Lucret.

*At liquidas avium voces imitaries ore
Ante fuit multo, quam laevia carmina cantu
Concelebrare homines possent, aureisque juvare.*

Lib. 5.

FELICIA tempora! et nomine hercle digna
quod ab auro fortita sunt! cum nymphe securae
corporibus castis molle gramen in otio premebant,
et recubantes super cespitem amictum floribus o-
dores suaves spirantibus, melliflua voce choro uni-
verso succinebant.—At nunc dulcisono cantu com-
plent aethera, dum pulsati colles et alta nemora
laetam remittunt vocem, mutaque pecora ducta
Syrenum

Syrenum innocuo carmine, fixis oculis, blandos hauriunt numeros, et attentī secundas partes agunt.

TEMPORA terque quaterque felicia! cum homines intemerati caede scelestā pecudum, quae ipsos lacte atque vellere bearunt; fruges salubriores ab inarata tellure in summa copia, sine labore, carpebant; belli clangor raucifonus non illis quietem dirimebat; parvo contenti tutam aetatem degebant, sine luxu et deliciis, et sine malorum turba ea comitante; natura duce vivebant, harmonia et concors amor omne pectus possidebant, unde felicitatem istam coelestem, cujus admodum animi fuerant compotes, praegustabant. Nam certo certius est, nihil esse beatum nisi idem sit decorum, aptum, venustum et modulatum; et hoc virtus ipsa est. Vitium vero discordia, dissonantia, confusio et turpitudine est, molestiamque et dolorem parit, omni malo gravidum*. Nec promptissimum ingenium possit sibi fingere speciem ullam felicitatis in coetu beatorum, nisi quae ab harmonia deducta est, et in ea tanquam centro terminatur: et, ut ea fruamur nervos animi oportet esse puros, putos, et liberos ab omni onere, ne impediatur quo minus accinat infinito coelitem choro.

Haec

* *Harmonia soluta in animantibus, una naturae solutionem generationemque dolorum eo in tempore fieri dico; harmonia rursus contemperata, et in sui naturam protinus restituta, voluptatem fieri dicendum est. Plato in Philebo, vel de summo bono.*

Haec harmonia coelestis sublimior est, quam ut concipi possit a mentibus non defoecatis quae humi sunt defixae. Ille igitur, quo nemo mortalium hanc melius sapuit, ad musicam confugit artem, cum hujus adumbrationem ausurus esset,

*Then crown'd again their golden harps they took,
Harps ever-tun'd, that glittering by their sides
Like quivers hung, and with preamble sweet
Of charming symphony, they introduce
The sacred song, and waken passion high :
No one exempt, no voice but well could join
Melodious part, such concord is in heaven.*

PARAD. lost.

QUAM grande atque pulchrum ! longe tamen excidit ab illo miro consensu animorum qui Miltoni etiam elocutionis vim fallit. In amicitia autem, sive bonorum consensione (qua nihil, ut ait Cicero, a Diis immortalibus melius habemus, nihil jucundius), vel nusquam alibi hanc divinam harmoniam praesentire licet ; quae concitat charitatem erga aliquem, cujus cum moribus et natura congruimus ; et inde exardescit quaedam benevolentiae magnitudo, quae mentem ab omni prava φιλαυτία purgat, redditque meliorem : et aliquando ob parvam dissensionem, si aliquae disceptatiunculae forte intercesserint, praecipue inter Hymenaei cultores, amoris vincula ea de causa non

non prorsus dissolvuntur ; nam musica compositio
 dissonantiis recte adhibitis, non corrumpitur, sed
 potius propter istas admistas perfectior evadit.

Doctis fane notissimum est, quam maxima vis
 attributa sit musicae a Platone, Pythagora, eorum-
 que aëclis, et ad exponendam dispositionem et
 administrationem mundi, tam intellectualis quam
 materialis. Etenim motus rerum et stellarum cir-
 cutiones Pythagoras, Archytas, Plato, reliquique
 antiqui philosophi, sine musica, neque fieri, neque
 constare affirmaverunt ; omnia enim a Deo secun-
 dum harmoniam fuisse instituta. Prisci porro
 theologi, philosophorum antiquissimi, uti ait Plu-
 tarchus *, musica instrumenta in manus deorum
 imaginibus posuerunt ; non fane quod eos lyra aut
 cythara ludere putarent, sed quod nullum Deo
 opus convenientius esse judicarent, quam conso-
 nantiam et harmoniam. Sicut igitur qui propor-
 tiones sesquitertias, sesquiplas atque duplas quaerat
 in jugo lyrae testudine et clavis ridiculus sit, (nam
 quin et haec inter se longitudinem et crassitiem
 habere proportionem aptam dubium non est, cum
 interim harmonia in fidium sit considerata sonis);
 ita probabile est etiam corpora stellarum, inter-
 valla circulorum, conversionum celeritates, tan-
 quam instrumenta, recto ordine disposita, suam
 habere inter se, tum ad totam compagem universi

B

propor-

* Plutarch. oper. tom. 2. de animae procreatione.

proportionem; etiamſi nos quantitas et menſura lateant, tamen proportionibus iſtis quibus uſus eſt opifex, numerisque adſcribi par eſt animae inter ſuas partes concinnitatem, quibus illa praedita cum coelum ipſum innumeris bonis implevit, tum quae ad terram pertinent, tempeſtatum mutationumque dimenſis viciffitudinibus, optime pulcherrimeque ad procreationem et conſervationem eorum quae naſcerentur, adornavit. Cogitate * autem cum animis veſtris, an non coelum et res coeleſtes ſua concinnitate atque ſuis motibus agat anima, quae prudentiſſima ſit facta et juſtiſſima; huiusmodi vero illam reddiderunt harmonicae rationes, quarum imagines exſtent in conſpicuis mundi corporibus atque partibus; prima autem atque praeſtantiſſima vis viſibiliter contempera-
ta ſit animae, eamque ſibi-ipſi conſonantem atque morigeram, ſemper optimae ac diviniſſimae parti reliquis omnibus conſentientibus. Opifer enim cum adſumpſiſſet animam incompoſitam, et inordinatis motibus, brutisque et diſcrepantibus inter ſe vitioſisque exagitatam, quaedam definivit ac conſtituit, alia conduxit, atque inter ſe concinnavit, harmoniis uſus atque numeris: quibus equidem viliffima quoque corpora, lapides, ligna, cortices ſtirpium, beſtiarum coagula, dum inter ſe coaptantur et componuntur, pulcherrima ſpectacula, pulcherrimam remediorum atque inſtrumentorum praebent materiam; unde factum eſt, ut

Zeno

* Plutarch. *tract. jam citat.*

Zeno etiam Citieus hortaretur adolescentes ad spectandum tibicines, ut inde discerent quid cornua, ligna, calamique possent, ratione ad concentum edendum ea promovente.

FINES angusti, quos mihi in hac dissertatione praescripsi, non sinunt me ulterius exquirere arcana mystica, et vim numerorum et modorum in mundi gubernatione. Qui de hac re plura vult, Platonem consulat in Timaeo, vel Plutarchum de animae procreatione ex Timaeo, qui eandem plenius et magis dilucide tractavit.

VITAE autem ipsius nostrae ratio, gravis, hilaris, lenisque grata gaudiorum ac curarum vice reddita, numeris veluti et modis tota undique absolvi videtur; adeo ut apposite quidem admodum et eleganter philosophus, “ In summa constitua-
“ mus, hanc vitam, non secus atque musica est
“ ex gravibus, acutis atque mediis sonis, ex tri-
“ stibus, laetis et tolerabilibus attemperatam *.”

DENIQUE, si temporum priscorum felicitum et purorum amoenitate et nitore delinitus, quasi numine percitus, ἀεροβάτης, actus sum per devia nemora; vel si tenui scapha oceano immissa procelloso, a Syrenibus contemplationis plausibilis, omnibus instructæ

* Vid. Volusen. de animi tranquill. dialogum, quem novam demum luce Academiae hujus Praefecti cura et consilio, merito donatum esse, pulchri omnibus et veri amatoribus gratulamur.

instructæ ornamentis venustis castæ rectæque rationis, delusus, infigar acuto scopulo, vel in Syrtes naufragium faciam ; confido magistros meos peritos et doctos me extricatuos, et incolumem reducturos, cum causam erroris non esse ludibria lascivientis cerebri, sed argumentum ἐνθεον atque fasci-nans se cum reputent.

SECT. II.

PHILOSOPHIS probe notum est omnibus, quam mirabilis consensus atque συμπάθεια inter mentem et corpus intercedat ; etsi nostra comprehendere nequeat ratione quomodo a se mutuo afficiuntur corpus, ex materia constans, et mens, ab omni concretionem mortali pura. Usus autem plurimus, ne dicam quotidianus, nullum locum dubitandi relinquit, corpus hominis totum ita sonare, ut a motu animi quoque sit pulsus ; atque, ut antea diximus musicam esse affectuum animi dominatricem, non sane absurdum erit hos nuncupare ministros, sive instrumenta per quae corpus praecipue impellit, et unde ea oriuntur, quae post paulo proferenda sunt : vim autem musices in mente impellenda, rationibus certis firmaturi, primum afferemus communem consuetudinem gentium optime moratarum atque ornatissimarum, apud quas omnes in magno pretio semper fuit.

QUANTI equidem apud Judaeos musica esset ars testantur passim sacrae literae; et ode illa celebris, quam panxerunt propter Pharaonem atque copias ejus mari rubro obrutas, cum ipsi per medium illius, DEI O. M. beneficio, incolumes evasissent, satis testatur honorem quem huic arti Judaei olim deferebant. Indeque usque ad tempora melici Regis, non est quod dubitemus, quin semper fuerit in maximo pretio; qui quantum in hac arte profecerit, testis erit optimus ille poeta Buchanani Caledonius, qui poemata ejus divina latinitate donavit. Elifaeus vates bene novit quid possit musica, cum citharaedum arcessi jusserit, ad mentem deliniendam antequam a numine divino afflatus esset, scilicet, ut recte animus esset affectus cum Deum ipsum jam esset recepturus.

HANC artem inter alias Graeci adeo eximiam habuerunt, ut musicos et poetas qui antiquitus sane iidem fuerant, uno eodem nomine dignarentur, doctumque quemque atque sapientem τὸν μουσικὸν appellarent; qui vero ante alios eximie eminebat, hunc ad altissimum dignitatis gradum eveherent nomine τῷ μουσικωτάτῳ; quasi qui eatenus in numerorum rationibus, concordibus peritus sit et discordibus, eum non immerito progressum esse ad ipsum Diapason virtutis et philosophiae existimandum sit. Contra, fatuo ingenio et temperie dissonante, feminibus discordibus male conflata, duxerunt eum esse cujus a musica abhorrebat natura,
vel

vel ad harmoniam auris erat hebetior: talique nomen ἀμῦσος inditum est.

HOMERUS divinus cum poeta, tum musicus summus honore maximo suam artem, ut aequum est, multoties prosequitur: fortissimus enim Achilles animum delectabat antiqua heroum gesta ad lyram cantando *,

Τὸν δ'εὖρον φρένα τερπόμενον φόρμιγγι λιγαῖη
Καλῇ,——

Τῇ ὅγε θυμὸν ἐτέρπεν, ᾄδει δ'άρ'α κλέα ἀνδρῶν.

Iliad. ι. 186.

Idque solum negotii sibi dari reputarunt Poetae antiqui, per aetates fane complures, ut deorum laudes et decora, aut virorum fortium res praeclare gestas, hymnis ac paeonibus ad templa et aras celebrarent; ut, scilicet, eodem opere honorem superis atque heroibus haberent, et ad aemulationem captos admiratione mortales invitarent. Primum igitur in deorum conviviiis et triumphalibus hymnis, laetisque et solennibus festis musica fuit usurpata, ut ab historia Mosis et Davidis est colligere. Inde ad quaevis lautiora convivia et magnificas principum

* *Illum lyram pulsandi artem docuit Chiron medicorum antiquissimus; quod notavit Horat.*

Nobilis ut grandi cecinit Centaurus alumno.

Epod. 13.

pum et nobilium festivitates, conversa. Quem morem cum apud Aegyptios atque Judaeos tum apud Phaeacas et Graecos, ab antiquitate tantum non impervestigabili invaluisse, facile esset evincere *. Sic ad convivium Alcinous advocavit

————— Δείον ἀοιδὸν

Δημόδοκον τῷ γὰρ ῥα θεὸς πέριδῶκεν ἀοιδὴν

Τερπυῆν, ὅππῃ θυμὸς ἐποτρύνῃσιν αἰεῖδεν.

Hom. Od. β. 43.

et apud eundem Homerum in conviviiis procorum.

————— ἐν δέ τε φόρμιγγι

Ἡπύει, ἣν ἄρα δαίτι θεοὶ ποίησαν ἑταίρην.

Od. ρ. 271.

Virgilius itidem Iopan inter regium Didonis apparatus introducit;

————— cithara crinitus Iopas

Personat aurata, docuit quae maximus Atlas.

Hic canit errantem, &c. Aeneid. lib. 1.

CICERO † et Athenaeus ‡ hunc morem canendi
inter

* Gen. xxxi. 27. Job xxi. 11, 12. Is. v. 12. xxiv. 8.

† Gravissimus auctor in originibus dixit Cato, morem apud majores hunc epularum fuisse, ut deinceps qui accubarent, canerent ad tibiam clarorum virorum laudes atque virtutes. Tuscul. lib. 4.

‡ Prisci homines consuetudine legeque deorum hymnos et laudes in conviviiis ab omnibus cantari jusserunt, ut reverentia numinum, ejus quod honestum ac moderatum est, fines non translirent. Deipnos. lib. 14.

inter epulandum etiam observarunt; Pythagoras divinitus afflatus philosophus musicen, semper ad instituendos discipulos adhibuit, ut narrant Iamblichus *, Quintilianus †, et alii multi ‡. Et Plato || de liberis rite educandis differens, praecepit, ut “ cantilenas ad citharam canant, rythmosque et harmonias puerorum animis conciliare conentur, ut mitiores modestioresque et concinniores effecti, et ad agendum utiles fiant et ad dicendum: omnis enim hominis vita numerosa quadam indiget consonantia.” Ipse huic arti operam dedit **, et in republica sua eam non posuit in infimo gradu; nec non in libris suis saepe plurimi eam facit ut societati apprime utilem ††. Idem sentit Aristoteles ‡‡ de musica cum Platone; et

* *In vita Pythagor.*

† *Pythagoreis certe moris, et cum evigilassent animos ad lyram excitare, quo essent ad agendum erectiores, et cum somnum peterent ad eandem prius lenire mentes, ut si quid fuisset turbidorum negotiorum componerent.* Quintil. inst. lib. 3. cap. 9.

‡ *Pythagoras perturbationes animi lyra componebat.* Sen. de ira, lib. 3. cap. 9.

— *et mentes suas a cogitationum intentione, cantu fidibusque ad tranquillitatem traducere.* Cic. Tusc. lib. 4.

|| *Protagor. vel Sophist.*

** *Studiosissimus enim musices fuit Plato, ut qui Draconem audivisset Atheniensem, et Metellum Agrigentinum.* Plutarch. de musica, op. tom. 2. p. 1136.

†† *De republica. dialog. 3. et alibi.*

‡‡ *Politic.*

et Cicero in eandem sententiam manibus pedibusque discedit *.

Romanorum antiquissimi profecto fuerunt praediti virtute summa, tam civili quam bellica; tametsi facinora eorum praeclara aciem mentis nobis perstringunt, indomitam tamen morum ferociam animus in contemplando stupidus horret; adeo sane immanem, ut aequius esset eos habitasse loca deserta Nomadum, aut montes asperos, inter tigres Hyrcanas, quam laetum Italiae solum, mitique hominum consortio frui. Unde autem ista saevitia, nisi ab artibus liberalibus et musica praecipue ignotis, incultis atque contemptis? Postquam vero cum Graecia consuetudo, mores emollierat asperos atque limaverat, huic inter alias artes honos fuit haud secundus. Nam Masurius, vir longe optimus et sapiens, qui et interpretes legum fuit nulli inferior, musicis assiduam operam navavit, instrumentaque artis illius tractavit feliciter †.

TITUS, ille amor ac deliciae humani generis, nec musices quidem rudis, ut qui cantaret ac psalleret jucunde scienterque ‡.

C

SED

* *Assentior enim Platoni, nihil tam facile in animos tene-ros atque molles influere, quam varios canendi sonos, quorum dici vix potest quanta sit vis in utramque partem; namque et excitat languentes et languescit incitatos, et tum remittit animos, tum contrahit.* Cicer. de legibus, lib. 2.

† Athen. *Deipnosophist.* lib. 14.

‡ Sueton. *in ejus vita.*

SED ne multis congerendis fastidium moveam, testimonium tantum unum insuper addam, non fane leve, oratoris facundi, faceti; scriptoris lepidi, disertis; philosophi gravis; viri optimi; Imperatoris Juliani, qui in literis quibusdam Ec-dicio Praefecto Egypti datis, sententiam suam fat aperte nos edocuit; eamque propositis praemiis firmavit *.

QUID vero secum adferat momenti, quidve possit in sanandis morbis nunc est dicendum. Hujus
ufus

* “ Si qua res est studio nostro curaue digna, ejusmodi
“ esse sacra musica videtur:— nam quod citra nostra illa prae-
“ mia, non mediocrem fructum divinae ope musicae ex animo-
“ rum suorum purgatione percepturi sint, persuadent illi qui
“ recte hac de re statuerunt.” — Epist. Julian. Imper. Ec-dicio.

Etiam nunc dierum Itali, gens crudeli dominatu atque dira superstitione pressa, indole sunt adeo musicae arti obnoxia, ut ipsi rustici operam gregibus pascendis, vel agris colendis navantes, citharam (quam vocant Guittaram) constanter sibi comitem adsciscunt. Eadem regione natus Vida, populares suos describit ad hunc modum.

Quinetiam agricolas ea fandi nota voluptas
Exercet, dum laeta seges, dum trudere gemmas
Incipiunt vites, silentiaque aetheris imbrem
Prata bibunt, ridentque fatis turgentibus agri.

Art. Poet. lib. 3.

Et in proverbium apud eos abiit, Quod Deus non diligit illum, qui in odio habet muscen.

usus exemplum profert Galenus primum * : “ Et
 “ nos ob animi mores aegros quotannis non pau-
 “ cos perfanavimus, folis animi motibus ad de-
 “ bitum modum revocatis. Est vero non spernen-
 “ dus hujus sententiae testis, ipsum patrium no-
 “ bis numen Æsculapius †, qui multas scribi can-
 “ tilenas mimosque ridicularum rerum fieri et me-
 “ lodias quasdam instituit iis, quibus vehementiores
 “ irascibilis partis motus corporis justo calidius ef-
 “ ficerent.”

CENTUM post Æsculapium annis, usus ejus in-
 notuit Judaeis, et praxis ab iis recepta est : nam
 cum Shaulem perturbasset spiritus malus a Domino,
 (ita enim mente capi ex usu Hebraicae linguae di-
 cebatur ; uti a cl. Mead ‡ notatum est, qui porro
 recte animadvertit, “ illos morbos quorum causas
 “ naturales exhibere possumus, irae coelesti non esse
 “ tribuendos”) : “ suaferunt ei ejus affectatores,
 “ ut suis famulis negotium daret, ut aliquem tan-
 “ gendae cytharae peritum conquirerent, qui cum
 “ malo Dei spiritu correptum, pulsandis fidibus
 “ mitigaret.” Accersitus est David, et “ quan-
 docunque

* *de sanitate tuenda, lib. 1. cap. 8. tom. 5. ed. Charter.*

† *Æsculape fut de l'expédition des Argonautes, qui se fit au commencement du xxviii. siècle environ cinquante ans avant le siège de Troye. Le Clerc. hist. de la med. p. 1. liv. 1. c. 9.*

Pindarus etiam innuit Æsculapium morbos curasse
 μαλακαῖς ἐποιδᾶις. *Pyth. od. 3.*

‡ *Med. sacr. cap. 3.*

“ docunque accidebat Shaulem divino illo spiritu
 “ corripit, David correptam citharam, manu pul-
 “ fabat; atque ita respirabat Shaulus, et facef-
 “ sente ab eo malo illo spiritu, mitigabatur *.”

Usus ejus apud Graecos admodum frequens fuit
 omni tempore; etsi ab Hippocrate quod fane mi-
 rum, id non reperio semel memoratum.

THALES Cretensis adhibuit musicen ad pestem
 medendam, secundum Plutarchum †: “ Thaletem
 “ Cretensem, quem Pythii Apollinis oraculo ac-
 “ citum a Lacedaemoniis musica pestem tum gras-
 “ santem sedasse Pratinas scribit.”

EA magnopere usus est Pythagoras in morbis
 sanandis, praecipue iis qui mentem afficiunt ‡.

CONTRA maniam celebre fuit remedium mul-
 tumque decantatum. Asclepiades dicebat, nulla
 re magis phreniticos revocari, quam harmonia et
 musica ||. Dominam quandam nobilem Gallam
 memorat

* *Regum, lib. 1. cap. 16. edit. Castell.*

† Plutarch. *de musica, op. tom. 2. p. 1246*; et inter bo-
 diernos ad pestem medendam musicen maxime laudat Johan.
 Hebenstreit, in libro *Germanico Augsburg. imprim. 1563.*

‡ Iamblich. *in ejus vita.*

|| Hollerius *de phrenitide, cap. 5.*

Asclepiades, *secundo libro, adhibendam praecipit canti-*
lenam ad maniacos. Coel. Aur. lib. 1. cap. 5.

memorat Frank * quam dementia cepit a zelotypia orta, quae usu musices per tres menses e morbo prorsus recreata est.

Nos docet Martianus Capella †, febres a priscis medicis sanari, adhibita arte musica : cuiusmodi autem fuerint, quibus hoc gratum et jucundum medicamentum erat accommodatum, haud quidem memorat ; quamvis apprime videtur idoneum, ubi cruciatur aegrotus insomnia et delirio : duo febricitantium exempla, in quibus ita se res habuerunt, gravibus et spectatae fidei testibus sunt firmata. Musicus quidam bene notus febre laborabat continua, die septimo, delirio vexatus est vehemente et ferme perpetuo, non sine ploratibus, lachrymis, terroribus, et insomnia nunquam remittente ; tertio die postquam mente captus est, quasi natura ipsa monente, concentum musicum in cubiculo canendum efflagitabat, et a medico vix impetrabat. Cantica quaedam a M. Bernier conflata decantabantur. Quamprimum fidium vocumque symphonia aures pepulit, statim vultus placidus, oculi mites fiebant ; lachrymae prae gaudio manabant ; convulsiones intermittebantur ; eoque tempore sensu harmoniae, quam unquam alias maiore commovebatur. Cum res ita ex inopinato cessisset, semper enim inter canendum ad se redibat, et a morbo erat immunis ; cantibus autem desitis, iterum,

* *Satyr. med. diff. de music.* § 20. *Vide etiam plurima de ejus usu,* § 20. 21. 22. 23.

† *Lib. 9.*

iterum, ut prius tentatus est : in eodem cursu aliquamdiu perseveratum est. Tandem autem adeo necessarius ei fuit sive vocum sive nervorum cantus, ut cognatum quendam, qui interdum noctibus in cubiculo vigilabat, ad auxilium ei praestandum, canere et ad numeros etiam movere adigeret : at quadam nocte cum forte adesset nemo praeter aniculam quae ei inserviret, quaeque musices esset imperita, necesse erat esse contentum misera cantilena triviali quae ei una fuit, et ab illa etiam quiddam cepisse solatii postea confessus est. Ad summam, hoc modo absque ullo alio remedio, praeter evacuationem e vena pedis bis incisa, ad pristinam sanitatem restitutus est *.

SALTANDI magister aegrotabat feбри cum rabioso delirio quod elinguem reddidit, contra quam adhiberi non potuit medicina. Hic simulac auditvit fides, sicut gaudio correptus ex improvise, de lecto surgere conabatur ; in eo vero ab adstantibus retentus, nutu capitis assiduo, quod solum potuit propter vim allatam, indicium fecit quantam ex ea re voluptatem ceperit. Postea aliquanto furor evanuit, ideoque non amplius est cohibitus ; et intra quartam horae partem arcte et graviter dormire coepit, et interim morbus in crisin proVectus est, brevique convaluit aeger †.

IN

* *Histoire l' Acad. des sciences pour l'an. 1707.*

† *Ibid. pour l'an. 1708.*

IN melancholicis adhuc amplius est celebrata.
 “ Si igitur aut ob tristitiam, aut curam, aut ali-
 “ quem animalem affectionem vigilarint, primum
 “ quidem tristitiam et id quod molestum est,
 “ quantum ejus fieri potest recidemus; postea e-
 “ tiam jucundorum sonorum auditu, cogitatio-
 “ nem ab illis abducemus, et quidam fane sonum
 “ aquae placidum ad hoc machinantur, quo de-
 “ liniti ad somnum deducuntur *.” Et in *αγρυπνία*
 five infomnio quae fere semper melancholiam co-
 mitatur, quantum valeat, multa possunt allegari
 exempla: bene autem notum est quod a Seneca
 narratur et aliis de Moecenate, qui propter curas
 et animi anxietates per totum triennium exsomnia
 perseveravit, denique sopitus cantilenis blandis le-
 ne ex longinquo decantatis †.

QUAM utilis est ad conciliandum somnum allato
 exemplo sane quotidiano probat etiam Galenus ‡:
 “ Nutrices ipso usu edoctae mulcere solent infan-
 “ tes, dum aut offenduntur, aut plorant, motu
 “ mediocri, necnon vocis modulationibus, qui-
 “ bus non solum eos mitigant, sed etiam somnum
 “ conciliant, vel hoc ipsa testificante natura, ad
 “ musicen eos et exercitia suopte ingenio esse pro-
 “ penfos.”

PRAE-

* Paul. Æginet. *lib. 1. cap. 98.*

† Senec. *de provid. cap. 3.* Meibom. *de Moecenat. cap. 29. n. 8. &c.*

‡ *de sanitate tuenda, lib. 1. tom. 5. edit. Charter.*

PRAECIPUUS equidem usus est in affectionibus hypochondriacis ; nam Schenkius * memorat quendam aurifabrum in ejus arte callidum, atrabile graviter percitum revaluiffe ope musices : et a Jacobo Kornmesserò † et plerisque aliis in hisce morbis multum laudatur ; quibus assentit Celsus, dicendo, quod ad discutiendas tristes cogitationes symphoniae et cymbala strepitusque proficiunt ‡.

MORBIS auxiliari musicam Theophrastus libro de enthusiasmo scripsit ; et qui vexantur coxendice, eo cruciatu liberari, si quis dum urget dolor, Phrygiam modorum harmoniam, quam primi repere-runt Phryges et exercuerunt ||, tibiis canat. Idem prius ab Aulo Gellio ** notatur ut inveteratum : sed quod addit, per mollem tibiae sonum hoc esse factum, in eo falli videtur ; cum Phrygius modus apud antiquos omnium esset vehementissimus qui quasi divino quodam impetu auditores, ad insaniam adegit ††. Hanc rationem curandi morbum a multis esse commendatam, a Caelio Aure-

* *Admirabilem vim a Deo O. M. musicis harmoniis, &c. Schenk. lib. 1. obs. 12. de lycanth. et melan.*

† *Disput. inaugural. de affect. hypochond. 1665.*

‡ *Lib. 3. cap. 18. postea etiam frictionem admoveri lenem jubet, ita ut ne manum quidem qui fricaret vehementer imprimeret.*

|| *Athenaei Deipnosoph. lib. 14.*

** *Noct. Attic. lib. 4. cap. 13.*

†† *Bartholin. de tibiis veter. lib. 1. cap. 9.*

Aureliano traditum est. “ Alii cantilenas adhiben-
 “ das probaverunt, ut etiam Philistionis frater i-
 “ dem memorat, libro xxii de adjutoriis, scribens
 “ quendam fistulatorem, loca dolentia decantasse,
 “ quae cum saltum fumerent palpitando, discusso
 “ dolore mitescerent *.” Hujusque morbi tibi-
 cantu curati mentionem facit Martianus Capella,
 ut rem omnibus notam †.

Fertur etiam Ismeniam Thebanum plures Boeo-
 ticorum ischiadicos intentione tibiae vel cytharae
 sanitati restituisse. Gesnerus in literis ad Achillem
 Gasserum datis ut auctor est Johannes Udalricus
 Rumlerus ‡ se nosse ait, hominem per annum
 ischiadico afflictum dolore, multis remediis inca-
 sum applicatis, tandem recuperasse salutem, plus
 minus octo diebus, ad citharam indies saltando,
 usque dum sudor eliceretur. Velschius autem, ut
 verum fateor, hunc exitum censet ad corporis mo-
 tum potius quam musicen debere tribui.

Ad arthriticos dolores sedandos saepius est adhi-
 bita. Arthritis, ut ait Epiphanius Ferdinandus,
 harmoniae cedit ||. Et Plinius ** e Varrone profert
 contra podagram carmina esse apprime utilia: Sed

D

locus

* *Morb. chronic. lib. 5. cap. 1. de ischiadic.*

† *Philolog. lib. 1. cap. 9.*

‡ *Observat. med. obs. 98.*

|| *Histor. med. 8.*

** *Lib. 28. cap. 10. edit. Harduin.*

locus dubitandi relictus est, annon haec sententia ad magica carmina respiciat.

MEMORIAE traditum est a Franck *, quandam Dominam illustrem cantum nervorum unicum remedium omnibus morbis etiam puerperio usurpasse; idque in aetate provecta cum graviter in genibus laboraret dolore articulari; atque hoc instituto vitam produxisse usque ad sextum supra centesimum annum.

PECHLINUS † autem ait, “ Notus mihi olim
 “ professor podagricus fuit, cui in perpetuo et uno
 “ paroxysmo mitiora intervalla, non medicinis aut
 “ linimentis, sed harmonia musica, quam perditae
 “ amabat, conciliata.

DENTIUM dolori levamini esse pluribus exemplis probat Balth. Krysingius ‡, aliosque dolores eodem remedio levatos esse, in proclivi esset ostendere in autoribus medicis. Christ. Sorgelius refert || principem quendam virum cephalalgia levatum audita testudine; itemque rusticum eodem oppressum dolore fuisse liberatum harmonia utricularis tibiae.

UBI malum quid nervis infedit, nunquam non maximum commodum attulit. Vossius ** a Theophrasto,

* *de musica*, § 20.

† Pechlin. *observ. lib. 3. obs. 29.*

‡ *Disput. inaug. de odontalg. tactu sedanda*, cap. 8.

|| ————— *de dolore capitis*, cap. 18.

** *de musica*, cap. 4. § 13.

ophraſto, in libro Apollonii Caryſtii de hiftoriis mirabilibus, teſtatur cantum, praecipue tibiae, mederi morbo comitiali : eundemque inſigni eſſe uſui in ſanando deliquium animi, ſive lypothymiam : attamen fertur quandam eſſe adoleſcentulam adeo comparatam, ut ad ſonum tympani pulſati ſtatim animo linqueretur *.

MORBUS iſte natus a nervorum diſtenſione dicta St. Viti chorea, quod ſubinde aegri etiam inviti ſaltant, quo juniores utriuſque ſexus interdum opprimuntur ; uti aiunt, eodem remedio ſanatur †.

HISTORIAM narrat Julius Caefar Scaliger ‡ de milite quodam Vaſcone, qui ad Phormyngis ſtrepitum urinam reddere neceſſario conatus eſt, cum quibus et ubicunque fuerit ; ſimile de alio generoſo narratur, qui eodem modo affectus eſt ad inſtrumenti illius plebei ſonum §.

AT nullibi vis muſicorum adeo decantata eſt in medendis morbis ac in tarantaliſ, ſive demorſis araneo apulo tarantula dicto, opem afferendo.

QUI morſi ſunt a tarantula, ſentiunt ictum non abſimilem ei quem apis aut formica infligit : paucis elapſis

* *Miſcellan. Acad. N. C. decur. I. an. I. obſ. 134.*

† *Franck. diſſert. de muſ. § 41.*

‡ *Exercitat. 334. § 6.*

§ *Miſc. A. N. C. loc. jam citat.*

elapsis horis a morfu, aegri ingenti cordis angore, gravi moestitia, sed graviori spirandi difficultate corripuntur; moesta voce conqueruntur, oculis turbatis inspiciunt, et interpellati ab adstantibus ubinam doleant, vel nihil respondent, vel affectam cordis regionem manu pectori apposita demonstrant, quasi cor prae caeteris afficiatur: demorsa pars quandoque dolore, quandoque stupore insigni prehenditur, circulo livido, nigro, aut subflavo statim dehonestatur; paulo postea in tumorem dolorosum attollitur; aliquando variis tarantali delectantur coloribus, praecipue rubro, viridi, aut caeruleo, raro autem nigricanti. Etsi adstantes incedant vestibus eo colore diffusis, qui tarantalus ingratus est, necesse est, ut ab illorum aspectu recedant; nam ad intuitum molesti coloris, angore cordis, et symptomatum recrudescentia, statim corripuntur. Omnia haec varia sunt pro varietate tarantularum, aegri temperie, et consimilibus; tarantula venenifera notandum est, duntaxat est in Apulia, et praesertim camporum incola; nam quae in montibus Apuliae vicinis reperitur, vel nullo, vel non pernicioso veneno pollet; et si eadem campestris Apuliae tarantula in exteras regiones, Neapolim scilicet, Romam, aut alias transferatur; si mordebit nulla ibidem afferet patientibus incommoda, et si afferet, pauca erunt et levia.

Ad horum symptomatum curationem frustranea propemodum sunt omnia remedia quae proponi possent

sens, nisi praesto sit, et adhibeatur musica. Adeo de modo saltandi pauca mox dicemus.

A tarantula demorſi, paulo poſt humi concidunt ſemimortui, cum totali virium et ſenſuum jactura, difficulter quandoque ſpirant, quandoque luſtuoſe ſ. ſpirant; frequenter tamen immobiles jacent veluti exanimes. Inchoato muſices ſono, ſenſim miteſcere incipiunt ſymptomata antedicta; aeger digitos, manus, mox pedes movere incipit, et ſucceſſive caetera membra; creſcenteque ſonorum modulatione motus ipſe membrorum auge-
tur, et ſi patiens humi jacet vehementiſſime in pedes elevatur, ſaltationes inchoat, ſuſpirat, et modis fere admirandis contorquetur: vehementes has ac primas ſaltationes pluribus horis, ſed frequenter duabus, tribus horis continuat; poſtquam vero paululum quieverit in lecto, ad ſudores abſtergendos, viresque reficiendas, eadem vehementia ſaltationes redintegrat, et facta ſupputatione duodecim fere horas quotidie impendit in ſaltationibus viciffim inſtitutis; et quod mirum eſt, hiſce ſaltationum laboribus laſſitudinem aut debilitatem aliquam non ſentit, ſed exinde agilior fortiorque evadit.

Post tertium vel quartum diem frequentiffime ab omnibus ſolutos ſymptomatis ſe perſentiunt aegri; tum enim ſpoliata ſanguinis maſſa virulentis partibus per ſupervenientes ſudores priſtina ſalutis

lutis commoda recuperat patiens, et toto illo anno a pravi morbi symptomatis immunis vivit: sudores a vulgaribus tamen diaphoreticis provocati, hoc idem praestare haud possunt *.

Isti effectus ita prorsus omnem opinionem superant et fidem naturae, ut apud plurimos in dubium veniant. At praeter Epiphan. Ferdinandum †, Baglivium et Ludovicum Valettam ‡, testes omnes idoneos, rei veritati testimonium perhibet nostras Boyle, naturae mirabilium curiosissimus indagator ||, et vir spectatissimae fidei: quibus addendi essent, si res postularet, adstipulatores M. Geoffroy, qui apud academiam Gallicam omnia haec rata fecit compluribus argumentis; et Jesuita quidam Tolonensis, qui in literis ad Patr. Guidonem, narrat ipsum vidisse militem tarantatum, per multos dies saltantem ad modos musicos.

S E C T. III.

QUAM mirabilis inter mentem et corpus nexus, et *συμπάδία* inexplicabilis intercedit, jam breviter attigimus:

—E

* *Vid. Bagliv. dissertat. de tarant.*

† *Observation.*

‡ *De phalangio Apulo op. Neap. 1706.*

|| *Effects. &c. cap. 6.*

— *E thuris glebis evellere odorem*

Haud facile est, quin intereat natura quoque ejus.

Sic animi, atque animae naturam corpore toto

Extrahere haud facile est, quin omnia dissolvantur.

Implexis ita principiis ab origine prima,

Inter se fiunt consorti praedita vita.

Lucret. lib. III.

Unde animus nulla perturbatione commotus est, quin ab ea corpus eodem tempore multum commovebitur, insignesque subibit mutationes : et similiter quicquid corpus afficit, idem pariter immutat mentem. Sic atra bilis a motu vehementi in aere calido et sicco, cibo austero et terrestri, aphrodisia saepius quam par est facta multisque aliis causis, in praecordiis congesta, parit melancholiam ; et dolor et tristitia, quae sunt omnino mentis affectiones, si diutius imperium obtinent, atram bilem gignunt *, cum bene magna malorum caterva ; onere in hypochondriis gravi, anhelitu, ructibus acidis vel putridis, spasminis, flatibus et borborygmis.

Cum mens laetitia afficiatur, dilatatur cor, spatium festivus sanguis atque toto corpore facile fluit, laxatisque meatibus cuncta permeat ; hinc genae colore vivido roseo suffunduntur ; hinc gratus tepor, hinc tumidus calor ; hinc vegetus nitidusque

* ΗΥ ΦΟΒΟΝ ΚΑΙ ΔΥΣΔΥΜΙΑ, &c. Hippocr. §. 5. aph. 23.

dusque totius corporis habitus, et status; hinc
 carnes succo imbutae turgescunt; cuncta haec ex
 sola vasorum dilatatione consequuntur: oculi
 splendent; nonnunquam tamen prae summo
 gaudio et voluptatis sensu, ita languent ut morien-
 tis esse videntur; labia purpurea et humida; lo-
 quelam praecipitanter tripudians lingua fundit;
 gestuosae sunt manus, pedes subfultim tripudi-
 antes; hinc non unius duntaxat partis delectatio
 est, sed toto corpore diffunditur, cor explicat, ce-
 rebrum recreat, diaphragma titillat, lienem mol-
 liter succutit, jecur dulci calore perfundit, pul-
 monem et pectus dilatat; itaque non parum salu-
 bris est et sanitati commoda: verum cum magna
 est et inopinata, horrenda symptomata conciliat;
 animi scilicet deliquium et aliquando mortem i-
 psam.

CONTRA autem in luctu et tristitia omnia toto
 coelo aliter se habent: haec enim passio cor, venas
 et arterias, omniaque viscera, immo et cerebrum
 ipsum contrahit; hinc parum sanguinis arteriosi
 in carnes effunditur, contractis scilicet meatibus;
 hinc pallor vultus et frigus; subsidit caro; na-
 sus acuitur; genae cadunt; adducuntur turban-
 turque oculi; frons etiam contrahitur et corru-
 gatur, hiant oculi; albescunt macerata labra;
 cuncta frigent; vox tremula, lingua minus expe-
 dita evadunt, atque crebra et gravia suspiria ex
 imo pectore edit miserrimus homo.

TIMOR etiam vasorum contractionem, nervorum deliquium, viscerum, et omnium fere membrorum defectionem inducit; pulsus timentis est parvus et frequens; os pallidum; tremantes artus; trepida vox et lingua; strident dentes; turbantur oculi; dilabuntur genua; alvus laxatur; respiratio est difficilis: omnia timet meticulosus,

—non sine vano

Aurarum et silvae metu.

Nam, seu mobilibus vepris inhorruit

Ad ventum foliis, seu virides rubum

Dimovere lacertae,

Et corde et genibus tremit.

Hor. lib. I. od. 23.

Sanitati valde contrarius est, et varios morbos conciliat; immo aliquos prae timore obiisse historiarum monumentis traditum est.

AUDACIAE motus, timoris motibus sunt omnino contrarii; ut enim timor contrahit, ita audacia omnia explicat: magnus est cordis motus, et magnus pulsus, hinc copiosi caloris et sanguinis arteriosi appulsus; hinc vivus color; micantes oculi; firma vox; erectum collum; habitus, vultus, frontis, corporis alacritas; mirus fibrarum nisus et conatus adversus malum imminens, quod per audaciam superandum aggredimur; hinc pallor, tremor, aliaque id genus absunt quae timor

E

inducit.

inducit. Audaciam puerorum et foeminarum ira ut plurimum comitatur; longe nobiliores sunt audaciae masculae characteres, vultus scil. majestate quadam venerandus, non inamoena ferocitas; generosa moderatio; alta supercilia; intrepidus aspectus; et in ipso conflictu accensa facies; pili horrescentes; venae tumentes; tensi muscoli; apertae nares; pressa labia; strictique dentes; terram pede quatit audax, salit, insilit, nervos omnes tendit ac vires explicat; percutit; sustinet; frequenti et solito majore respiratione pectus attollitur; magno, crebro ac vehementi motu sese agit cor; voce ipsa sese animat.

IRACUNDO pulsus altus, creber, velox; rubet vultus; frons corrugatur, colligitur, contrahitur; modo attolluntur, modo deprimuntur supercilia;

—ex oculis micat acribus ardor;

Vox rauca et horrifona est. At si ira maxime accendatur, dentibus stridet, frendit, spumat; cuncta projicit, ac rumpit; sibi manus infert, et radicatus capillos evellit.

QUODLIBET corpus sonorum, si feriat, motibus suis vibrantibus circulos quosdam, quales in aqua videmus, cum quidpiam grave in eam deciderit, in aere excitat; ii pulsus sive undae dicuntur. Aer autem hoc tremulo motu in externam

aurem

aurem actus, ibique congestus, varie inter inaequalitates ejus refringitur priusquam per flexuosum ductum auditorium pertingit ad tenuem et siccam membranam ejus fundo subtenfam et offis circulo adnexam, quae membrana tympani vocari solet. Officula etiam tria, malleus, incus et stapes dicta, huic membranae, quacum ut et inter se committuntur, iteratis fluctibus agitatae subiecta, haud aliter quam aer ipse in eodem cum iis antro conclusus, necessario una commoventur. Cumque stapidis ima pars occludat ovalem fenestram, ista atque aer in cavitate tympani, motum receptum communicare possunt cum vestibulo et aere in eo incluso; deinde cochleae et tribus meatibus semicircularibus. Fenestra etiam rotunda ab aere in tympano agitata, itidem impertit motum ei qui comprehenditur in scala inferiore cochleae; hic autem ibi arcte inclusus vehementer concutit laminam spiralem, quae cum sit ex dura sicca et fragili materia conflata, situque apto, et figura spirali et inaequali, maxime videtur idonea agitari ab aere commoto, et aptissima esse ad fungendum omnibus hujus sensus muneribus; dum nescio quid nervulorum, aciem oculi fugiens, per totam ejus superficiem expansum, simul concutitur; atque eo concussu ad cerebrum perveniente, excitatur in mente sensatio sonitus et tonorum, qui variantur perinde ac varie agitur lamina spiralis. Nos ita breviter, crassiore sane musa, exposuimus, quibus rationibus aures a sonis afficiuntur;

tur; sed quo pacto his motibus mens ipsa percellitur, atque animi affectus excitantur, non ita facile dictu est ex physicis principiis; immo captum humanum plane superat:

*Quorum ego nunc nequeo caecas exponere causas,
Nec reperire figurarum tot nomina, quot sunt
Principiis, unde haec oritur variantia rerum.*

Lucret.

EFFECTA saltem certa, quibusdam sonis auribus perceptis, constanter et perpetuo succedere usu compertum habemus. Horum sensu facilius forte tanguntur qui terras propiores soli colunt; et, caeteris paribus, qui temperie sunt calidior et habitu vivido; nec non qui mobilitate quadam et mollitie fibrarum praediti sunt, omnesque sane quorum aures non sunt vere Batavae. Rem obscuram fortasse dilucidior reddet, si existimemus musicen esse imitationem sonorum, accentuum, suspiriorum, vocis inflexionum, et, ut uno verbo expediam, sonorum omnium quibus natura ipsa ad exprimendas perturbationes et affectus utitur: horum indicia natura insita, colligit musice, iisque utitur sagaciter, ut major vis addatur vocibus modulandis; et ideo necesse est commoveri animos nostros ab his incantamentis, quandoquidem vox sit ipsius naturae*. Hac enim duce, Corellius et

* *Natura ducimur ad modos; neque aliter enim evenerit, ut illi quoque organorum soni, quanquam verba non exprimunt, in alios tamen atque alios motus ducerent auditorem.* Quint. Inst. lib. 9. cap. 4.

et nostras Purcellus affectiones ad libitum moderati sunt; hac eadem duce, Handelius animos percellit et domat. Elegantia autem et varietas harmoniae, venustas atque novitas modorum musicorum non sunt utendae, nisi ad exprimendas et ornandas effigies vocales Deae naturae.

Si porro de sonis affectus quolibet animi conciendo idoneis cogitationem suscipiamus, plane nobis comparebit esse musicen vocis naturae imitationem, modosque atque numeros, uti notat acutissimus philosoph. Verulam *, cum animi affectibus habere quandam convenientiam ex natura ortam; cum alii laetitia, alii tristitia mentem afficiant; alii religionem, alii autem miserationem nobis concitent. Mirum igitur non est animum ab illis commoveri, cum a natura ante dispositi sint tentare intimos audientium sensus. Ita modi celeres, leves, subsultantes et alacres, laetitiam et festivitatem inspirant: at contra, toni graves, solennes et lugubres, lente ferientes aures, animo tristitiam tetram inducunt, et languorem a gaudio penitus abhorrentem. Magnus itidem asper et concitatus, nec consonus admodum sonus, ad iram ac proelia movet, adeo ut facit hominem oblivisci sui ipsius: ob id recte in proeliis, maxime in initiis, tubis et tympanis obstrepunt, et clamorem edunt milites. Sed toni quasi aequis passibus usque progredientes, (ubi sequentes, quod ad acutum

* *Natural History.*

tum five grave, vel durationem attinet, a praecedentibus non multum discrepant), perturbationes animi deliniunt, acerbis ejus curas fopunt, et tranquillitatem donant : Istiusmodi, sine dubio, fuit ille modus spondaicus, quo Pythagoras impetum repressit et coercuit quorundam juvenum qui castae mulieris fores effracturi jam fuerunt, modo scilicet Phrygio nimis diu continuato ad insaniam adacti ; attamen modulo lento atque gravi, statim facti sunt tranquilli, et ab instituto nullo negotio dissuasi sunt.

ACCURATE expensa natura motus, variisque adhibitis experimentis, monstraverunt liquido mathematici momenta corporum motorum ad amussim respondere productis e mole et celeritate factis ; corpusque quamvis parvum, et quamvis haud magna celeritate motum, incidens in majus quiescens motum aliquem ei communicare possit. Has leges motus firmissimis argumentis explicaverunt Baglivi *, Borelli † atque Boyle ‡ ; et insuper ostenderunt effectus penitus mirandos consequi motibus etiam minimis et minime praeceptis, vel saltem non observatis et neglectis.

QUID hoc ad rem nostram conferat, nunc est videndum.

A

* *Dissertat. de tarant. cap. 13.*

† *de vi percussiois.*

‡ *Effects of languid and unheeded motion.*

A philosophis compertum est, soni pulsus sive undas per 1142 pedes * ferri in minuto secundo horae; eaque de causa effecta consideratione digna dabunt in corporibus etiam inanimatis, quod multis experimentis firmavit Boyle †. Ei adstipulatur clarif. Anatomiae Professor in hac Academia: hic enim nobis retulit, quod si quando tonum peculiarrem scalarum quarumvis in hac urbe adinvenerit, vocemque suam ultra hunc tonum ad diapason intenderit, totas scalas agitare valeat sonitu vocis. At in corporibus quae pluribus organis constant, motus excitare sunt multo efficaciores; idem Boyle ‡ refert se saepenumero sensisse quendam rigorem, qualem in accessu febris aegri sentiunt, cum repetiti fuerint duo quidam versus Lucretii; Derham itidem, ut ipse innuit ||, istiusmodi horrorem circa praecordia et caput sensit, dum recitarentur a se, vel alio, cap. liii. Isaiae Prophetae, aut Threnodia Davidis propter mortem Shauli et Jonathanis. “ Porro contingit, ait Baglivi **, ut “ quisque nostrum, dum insolitam quandam ac “ gratam musices harmoniam sentit, quaedam ve-
“ luti

* Flamsteed, Halley, Derham. *Haecce supputatio multum accuratior est, quam illae quae a Marsenno, Boyleo, Newtono, et Academ. Gallica, factae fuerunt. Academ. del Cimento usque ad pedes mclviii eodem tempore sonos movere supputaverunt.*

† *Effects of languid and unheeded motion, chap. 7.*

‡ *Ibid. chap. 6.*

|| *Physico-Theology, book 4. chap. 3.*

** *Dissert. de tarant. cap. 13.*

“ Iuti oberrationes blandi horroris, five rigoris, per
 “ cutim immo et aliqualem capillorum erectionem
 “ inter initia experiatur.” Hujusque effectus haud
 expers ipse fui, et amicis pluribus eodem se esse
 affectos quandocunque auribus hauriunt dulcisonos
 concentus musicos certior factus sum. Hinc liquet
 manifesto, celeres agitationes et iteratas vibratio-
 nes sonorum musicorum corpus nostrum posse per-
 cellere valde, et rationem five statum ejus mutare.
 Vim autem istam miram quae iis insit concitandi
 affectus animi, superius demonstravimus. Con-
 silium igitur nunc est quod restat hujus dissertati-
 onis impendere in exponendo, ut possumus, ratio-
 nem, qua hae duae proprietates (quae semper
 junctis viribus militant) compagem corporis affi-
 ciunt.

Si ad ea quae Sect. II. memorata sunt respiciamus, potissimum adhibitam fuisse musicen intelligemus ad corrigenda hominum ingenia et mores, pravaeque mentis affectiones; et deliniendos corporis acerbos cruciatus, quales ischiadem, podagram dentium capitisque dolores, &c.

SIQUIDEM excitare in animo ideas venustas et purissimas, perturbationesque mentis violentas componere et pacare possit *, certo certius est apprime esse

* Quicumque permittit ut musica animum suum assidue circumsonans occupet et demulceat, perque aures, veluti per infundibula, harmonias infundat, quas supra commemoravimus, suaves, blandas, molles ac flebiles, atque aetatem suam in modulis animum delinientibus consumit; is primum quidem se quid iracundum habebat, tanquam ferrum demollit, et utile ex inutili duroque efficit. Plat. de rep. d. 3.

esse utilem inclinationes pravas mutare et emendare. Confitendum autem est, non minimum deberi materiae seu sensui canticorum, nec omne esse attribuendum modulatu, praecipue apud veteres. Novo quidem exemplo illustrior haec facta res est. GALLI enim laus *, testudine haud ita pridem callide perquam resonans, mirum fane in modum vel legentium animos excitare valet et reficere. Nec injuria; natura enim, unde animi potissimum imperio utimur, incredibilem nescio quam vim, cui frustra obnitimur, rebus indidit ac sententiis: ab usu autem (nisi si cui a natura hoc profectum quoque videbitur) sua etiam verbis inest modorum et numerorum gratia.—Carmen porro illud Musaeo † sacrum varium quidem, *et* pium undique et lugubre, quis legit relegitque, quin animum sibi poetico prorsus dolore, summa nimirum cum dulcedine conjuncto, perfundi statim sentiat, nullumque esse posse modum omnino fateatur, aut pudorem tam cari capitis desiderio. Attamen hae artes (musicen volo et poeticen) natura sua conjunctissimae sunt. “ Omnes artes quae ad humanitatem pertinent, habent quoddam commune vinculum, et quasi cognatione inter se continentur ‡.”

F

MEDICINAM

* *Vid. Ode performed at Cambridge, July 1749, at the Installation of the Chancellor.*

† *Monody, to the memory of Mr. Pope.*

‡ *Cicer. pro Archia.*

MEDICINAM exercentibus multo usu comper-
tum est, quam pertinaciter remediis efficacissimis
obsistunt morbi melancholici et hypochondriaci,
dum animus dolore contabescit, et moerori nimi-
um indulget. Si igitur haec animi tetrica atten-
tio alio averti posset, morbus infelix diaetae, ex-
cercitationi, paucisque medicamentis nullo labore
cederet. Epicurus citante Tullio *, “levationem
“aegritudinis in duabus rebus ponit; avocatione
“a cogitanda molestia, et revocatione ad contem-
“plandas voluptates.” Quid autem plus valet
quam musica, ad recreandam mentem cura tristi
oppressam, et aegritudinem levandam? Moduli
quidem lenes, suaves, blandi, tristiculi, qui do-
lori inservire, et eum permulcere videantur, pri-
mo forte adhibendi sunt, ut aeger attentus redda-
tur, cum species menti exhibent, non absimiles
iis, quae jam diu illi obversatae fuere;

Ut ridentibus adrident, ita flentibus adflent.

Art. poet. 5. 101.

sensim erit pedetentimque facienda mutatio in mo-
dulos leviores, hilariores, festiviores, laetiores, qui
alias effingent species in Sensorio communi, tristi-
tia fugata, quam voluptas excipit contemplatione,
ut ait Tullius, dignissima. Tunc denique ci-
bus levis, mollis, recens, moderate alvum sub-
ducens;

* Tusculan. lib. 3.

ducens; aer calidus et humidus; agitatio haud violenta; simul cum medicamentis diluentibus, discutientibus, alvum cientibus, leviter exstimulantibus, bilem atram cito expellent, et Hygeian divam, venustam, faustam in ejus locum deducunt, redeuntes cupidines, lusus, risus, et gratiae blandae.

CORPORIBUS ad nervos admotis fit sensatio; commoti enim nervi propellunt ad cerebrum subtilissimum humorem, qui spirituum animalium vulgo nomine gaudet, et ex occasione ejusdem motus excitatur in mente nostra idea objecti, quo organum perculsum fuit. Et prout mens ab hac sensatione afficitur, aliquam partem ejusdem humoris amandat ad quosdam musculos ad imperia sua exequenda, sive fungendum muneribus animalibus. Sed ad hoc recte perficiendum, necesse est nervos et cerebrum ipsum omni vacare impedimento et morbo, ut succus iste aethereus quo opus est libere fluat, meatusque omnes ad mentis nutum quaqua-versum pertranseat; aliter orientur species contrariae atque falsae imagines e mente observabuntur, et inde facta dictaque abnormia, sive delirium nascitur. Tales mutationes in febribus frequenter accidunt nervis et cerebro, ex quibus mente captus evadit aegrotus; at pravam hanc dispositionem corrigere, humores crassos rarefacere, vel saltem corporis statum multum immutare agitando nervos auditorios, vel potius totam eorum compagem, maxime
valet

valet musica; quo certae et verae species menti exhibeantur; unde munera sua recte obit et aeger rursus ad se redit, mentisque compos fit, item musica certis speciebus sive imaginibus gratis menti representatis, a vagis et falsis mentem avocare potest; et dum idea jucunda ei obversatur, fiet tranquilla, mitis et serena.

SYMPTOMATA morsum venenatum tarantulae sequentia plane delirium indicant; ubi ob tene-riorem sentiendi facultatem nervosi generis, levissimi ictus externi motus varios et enormes cient in corpore. Baglivi suspicatur sanguinem esse coagulatum a veneno; atque hoc modo conatur rationem reddere effectuum musices: probabile est motum velocissimum a musicis instrumentis aeri impressum (id genus velocissimi soni tarantatis familiaris ab Italis vocatur *tarantella*) et ab aere cuti, mox spiritibus et sanguini communicatum, incipientem eorundem coagulationem paulisper dissolvere, disgregare, excitare, et dissolutionis effectus crescere sono ipso crescente, donec tandem per repetitas has succussiones ac veluti vibrationes pristinam fluiditatem humores acquisiverint, quo facto aeger reviviscit, membra movet, in pedes elevatur, suspirat, et vehementes inchoat saltationes, donec evocatis sudoribus, veneni semina foris eliminata fuerint *.

AN

* Bagliv. loc. jam. citat.

AN succus nervosus ut Mead *, an sanguis, ut alii conjecturam faciunt, primum vitiatum est, non ita magni est disquirere; cum procul dubio ab agitationibus et vibrationibus nervorum, et sanguis et omnes succi affecti erunt; quamvis hic esse musicam imprimis utilem rationi consentaneum est, quod animi perturbationibus, (quae in tarantatis sunt vehementiores) cohibendis et placandis adeo sit apta. Modos autem incitatos et numeros velocissimos esse necessarios docet experientia, et hos laetitiam et hilaritatem movere probe novimus. Qui alacrior est enim in his terris, ubi vigor animi corporisque prae frigore elanguescit, vix a saltando se continere potis est cum laetiores moduli animum laetitia inspirant. Quid igitur tam mirum, si tarantatus, cum primum fides sonum ediderint, etsi quasi mortuus omnibusque resolutis nervis jacuerit, statim pedes et manus movere inciperet, et tandem furore musico percitus tres quatuorve horas continenter saltaret. Potissimum certe ab animi perturbatione reditum istum mirum ad vitam effectum esse videtur; aliquid tamen dandum est vi supra memoratae motuum tremulorum aeris a subsultibus musicarum chordarum percussi et modificati, elasticas cerebri fibras varie exagitantium: vero quidem simillimum est, affectus animi esse concitatos ab his ipsis tremoribus ad cerebrum per nervulos communicatis, et hoc pacto, utraque virtus musices, unita vi, suppetias fert miseris.

EADEM

* *Introduction to Essays on Poisons.*

EADEM in curando comitiali morbo felici exitu fuit usurpata, ut supra dictum; morbus iste dirus originem a variis causis sortitur; inter alias res, metus ex repentino periculo hujus morbi in causa esse potest; idque fortasse perturbando cerebrum. Sic causa quaedam externa (ut luxus, luna nova et plena, &c.) in scenam profert atrocia illa symptomata, quae Lucretius eleganter ob oculos ponit, his verbis;

*Quinetiam subita vi morbi saepe coactus
Ante oculos aliquis nostros, ut fulminis ictu
Concidit, et spumas agit, ingemit, et tremit artus,
Desipit, extentat nervos, torquetur, anhelat
Inconstanter, et in jaetando membra fatigat :
——Uti jam morbi se flexit causa reditque
In latebras ater corrupti corporis humor,
Tum quasi talipedans, primum consurgit et omneis
Paullatim redit in sensus animamque receptat.*

Lib. 3.

Cum terror subitus hunc morbum parit, iteratae vibrationes aereorum pulsuum cerebrum agitantes, priori ejus conditioni mutationes quasdam inducere possint, nec quidpiam est ad hoc magis idoneum quam plenus et grandis instrumentorum vocumque musicus concentus, qui ex improvviso aures aegro percelleret: conjectura saltem haud est absorta vero.

Quod ad animi morbos prorsus omnes attinet, notatu dignum est, iis laborantes delicata vi sentiendi,

sentiendi, et facultatibus praeditos tenerioribus, ita ut sensus facillime commoveantur rebus externis: unde affectiones cientur occasione levissima, fibraeque nervorum minimo momento sunt mobiles, adeoque maxime moventur musica.

Ad dolores sedandos vehementiores utilis esse potest, dum oblectat mentem et coram sistit species jucundas, quae animam sentientem quasi delinunt et ab angore contemplando abstrahunt; quemadmodum etiam gratae notiones in animo excitantur a Laudano, et cruciamenta morborum saevissima demulcentur, quia nervos voluptate quadam titillat. Quando vascula tenuiora sunt obstructa, sicut in arthritide, quae obstant omnia possunt removeri soni frequentibus impressionibus; itaque hac ratione ischiada ab inveterato impedimento natam in ischiadico nervo, sublevandam esse, more veterum, a fide forte non abhorret: nec ab hoc multum abludit actio emeticorum, quae in eodem rerum statu adeo iuste laudantur, nervos enim quassant et agitant; at insuper ob alias rationes sunt utilia. Sed cum ischias ab inflammatione tunicarum nervorum oriatur, (cui comites adsunt pulsus citus, febris, et in parte affecta fervoris sensus), alia via tentanda est, scilicet, per venae incisionem et methodum antiphlogisticam.

QUIDAM soni modulati, suis vibrationibus, concutere possunt nervos, per quod spiritus emissi sint
ad

ad hos vel illos musculos, qui tunc moveri sunt coacti. Equitis, de quo narrat fabulam Scaliger, quantum cogitatione complecti possum, musculi ad expellendam urinam inservientes hoc modo intenti fuerunt ad sonitum phormyngis, adeo ut necesse esset reddere urinam, quove loco, vel cum quibuscunque fuerit. Ex qua historia ingeniosus medicus in hac urbe haud absurde suspicatus est, quod usui magno esse possit musica in quibusdam *ἰσχσριας* generibus, praecipue si a spasms vesicae sphincteris proveniat.

Ex superioribus igitur proclive est inferre, spe nequaquam inopi posse adhiberi musicam ad sanandum multos morbis gravibus affectos, nec alia ratione sanabiles. Mihi fuerat in animo, modulorum exempla proferre quae ad singulos animi atque corporis dolores leniendos commoda essent; atque huic consilio abunde sufficerent deserta locorum Scotiae, quae omnimodo suavissimis numeris, etiam indocta resonant; sed modus orationis ab instituto me absterret.

DENIQUE quandoquidem in rebus gerendis concordia et voluntatum consensio longe est anteponenda concentui sonorum, mutuo amore et benevolentia nos invicem prosequamur; summam erga omnes benevolentiam exerceamus; vel, ut verbo expediam, vitam ducamus harmonicam.

